

Kalaallit Nunaanni taxanik angallassineq pillugu nalunaarut

Inatsimmik allanngorneri ilanngullugit nalunaarutiginninneq nr. 995, 26. oktober 2009-imeersoq malillugu Kalaallit Nunaanni aqqusinertigut angallannermut inatsimmi § 69 malillugu aalajangerneqarpoq:

Kapitali 1

Atuuffia

§ 1. Qamutit motorillit annerpaamik aqutsisoq ilanngullugu, inunnik 9-nik angallassinissamut aaqqissugaasut atorlugit inuussutissarsiutigalugu inunnik angallassinernerup suliarineqarnissaanut, akuersissummik peqarnissaq piumasqaataavoq. Qamutit atorneqartut napparsimasut angallanneqarnerannut taamaallaat atorneqarpata, tamanna taamaattoq atuutinngilaq.

Kapitali 2

Taxanik angallassinissamut akuersissutit

§ 2. § 1 malillugu akuersissut kommunalbestyrelsimit tunniunneqassaaq.

Imm. 2. Akuersissutit amerlassusaat tulliuttut aallaavigalugit suliaasaqarfimmini kommunalbestyrelsip aalajangissavai:

- 1) akuersissutit tunniunneqareersimasut amerlassusaat taakkulu atorneqarnerat kiisalu
- 2) suliaasaqarfimmi tamarmi inuit naleqquttumik sullinneqarnissaannut qajassuussassat.

§ 3. Akuersissut taamaallaat inunnut ataasiakkaanut nalunaarutigineqarsinnaavoq.

Imm. 2. Akuersissut inummut akuersissummik piginnittumut tunngavoq aamma tunisinikkut, attartortitsinikkut, atortitsinikkut, qularnaveeqqusiussaqaarluni taarsigassarsinermi allagartatut, akiligassaqaqarfimmit malersorneqarnermi, kingornussatut periaatsilluunniit allat atorlugit, tamakkiiisumik ilaannakortumilluunniit tunniunneqarsinnaanngilaq. Pissutsit immikkut ittut atuutsillugit, kommunalbestyrelse pineqartumut tunngasumi avaqqutsisinnaavoq.

Imm. 3. Qamutinik motorilinnik nalunaarsorneqarsimalluni piginnittumut akuersissut suliarineqassaaq. Piginnittumut tassunga akuersissutit arlallit tunniunneqarsinnaapput. Taamaattoqarpata qamutinut ataasiakkaanut, taassuma pigisaanut, tamanut akuersissut suliarineqassaaq.

Imm. 4. Piginnittoq akuersissummi piumasqaatinik ingasattumik imaluunniit pigajuttumik uteqqiattumillu, imaluunniit nalunaarummi matumani aalajangersakkanik unioqqutitsisimappat, taxanik angallassineq pillugu akuersissut kommunalbestyrelsimit atorunnaarsinneqarsinnaavoq.

Kapitali 3

Taxap aaqqissuuneqarnera, atortussai aamma nalunaaqutsersorneqarnera

§ 4. Qamutit atorneqartut aquttoq ilanngullugu minnerpaamik inunnit sisamanit atorneqarsinnaasutut aaqqissuuneqarsimappat, taxanik angallassinissamut akuersissut taamaallaat tunniunneqarsinnaavoq.

§ 5. Qamutit motoorillit qaavi matoqqasut, sunniuteqarluartumik kiassarnissamut- biilit igalaavini sermersimanernik piiiaatinik- aamma silaannarissaatinik atortulersorneqarsimasut kiisalu aquttumut imaluunniit ilaasumut iserfissatut- aniffissatullu naatsorsuussaasunik matunik marlunnit amerlanerusunik matullit, taxatut taamaallaat atorneqarsinnaapput. Ilaasut issiavii tamarmik ajornangitsumik ajornartorsiutitaqanngitsumillu tikinneqarsinnaassapput.

§ 6. Taxap qaavata saavani igalaap siumut sammisup qulaani, qaliami qulleq inissinneqassaaq, taannalu taxap ilaasussarsiornerani, piffissami qulliit ikinneqartussaaffiani ikumassaaq. Taksameteri atorneqartillugu qaliami qulleq ikinneqarsinnaassanngilaq, aamma kingumoortumik qaamanermik ersersitsissanani. Qulleq siumut qaamanermik qorsummik inngiananngitsumik takutitsissaaq. Allagartaliussaq tassaassaaq »Taxi« imaluunniit »Taxa« aamma qaava qaamasoq cm-it 75-it aamma 260-it akornanniissaaq. Qulliup tunuani »Taxi«-p imaluunniit »Taxa«-p atorneqarnissaa akuerisaavoq. Allagartaliussaq taanna qaamaneqassanngilaq.

Imm. 2. Taxami igalaap siumut sammisup tunuani issoqqaarissumik »Fri«-mik (Ilaasoqanngilaq-mik) allannertalimmik allagartaqassaaq, taannalu qamutip ilaasussarsiornerani atorneqassaaq. Qulliit ikinneqarfissaanni allagartaq ikumassaaq, aamma siumut sammisumik qaamasumik qorsummik qalipaatilimmik inngiananngitsumik takutitsissalluni. Taksameterip ingerlanerani allagartaq atorneqassanngilaq aamma ikinneqarsinnaassanani.

§ 7. Taxa sunaluunniit taksameterimik peqassaaq. Taksameteri qaqugukkulluunniit eqqortumik aamma akigitat atuuttut malillugit ingerlassaaq. Ingerlanneqarnermi akiusoq koruuninngorlugu øringgorlugulu aamma akigitataq, taksameterimi inissinneqarsimasoq, taksameterip takutissavaa. Takutit taakku ajornartorsiutitaqanngitsumik ilaasunit atuarneqarsinnaassapput aamma qulliit ikinneqarfissaanni ikumasumik taxarnermi qaammaqquteqassalluni.

Taksameterip tulluttut aammattaaq takutissavai:

- a) kilometerit ingerlaffiusut tamakkerlutik amerlassusaat,
- b) kilometerit ingerlassiffiusimasut amerlassusaat,
- c) taksameterimi tunngaviusumik akigitat qanoq amerlatigisunik atorneqarsimanerata nalunaarsorneqarsimanera,
- d) akigitat assigiinngitsut amerlassusaat.

§ 8. Akigititat pillugit aalajangersakkat atuuttut taxani tamani nassaassaassapput aamma inuit piumasaqarnerisigut takutinneqassallutik. Tamanna pillugu allagarsiussa qamutimi inunnt takujuminartumi nassaassaassaaq.

Imm. 2. Taxani tamani korti, paasissutissanik tulliuttunik takutitsisoq, inunnt takujuminartumi aammattaaq inissinneqassaaq:

- 1) piginnittup aqqa,
- 2) qamutip nalunaarsorneqarnermini normua kiisalu
- 3) qamutip inuussutissarsiutigalugu inunnik angallassinermut aamma ilaasunut qassinut akuerinerineqarsimanera.

Korti kommunalbestyrelsimit suliarineqassaaq.

Imm. 3. Taxami aquttup, noqqaassuteqarfigineqarnermigut biilersinnaanermut allagartaq ilaasunut takutissavaa.

§ 9. Taxap silataani illuttut piginnittup atia oqarasuaataatalu normua allanneqassaaq. Allagartaliussami naqinnerit qutsissusaat 35 aamma 60 mm-it akornanniissaaq kisitsisillu qutsissusaat 15 aamma 60 mm-it akornaniissalluni kiisalu qamutip qalipaataanit erseqqissumik allaanerusumik qalipaateqassallutik.

Kapitali 4

Taxap atorneqarnera

§ 10. Tamanna nunami aamma ikaartarfinni aalajangersimasuni aamma aqquserngit- silallu pissusaata ingerlassinermik ajornartitsinnginnera piumasqaatigalugu, taxarusuttunik taxami aqutsisup kommunimi sumilluunniit taxarniarluni inniminniinerit tamaasa erngerluni akuerissavai naammassillugillu.

Imm. 2. Orninniakkamut piumasqaatigineqartumut angallassinermi ingerlassineq, aqqusineq qaninnerpaaq atorlugu pissaaq. Ilaasup aqut alla innersuussutigippagu, taamaattoq aqqusineq taanna malinneqassaaq.

§ 11. Taxap ilaasussarsiornerani, allagartaq ilaasoqannginneranik takutitsisoq atorlugu aamma qulliit ikumaffissaanni aammattaaq taxap qaliani qulliup (ilaasoqannginnermi qulliup) ikinneratigut ilaasussarsiorneq ersersinneqassaaq.

§ 12. Taxap atorneqarnera pillugu kommunalbestyrelse malittarisassanik erseqqinnerusunik aalajangersaasinnaavoq.

Kapitali 5

Ingerlanneqarnerup akilerneqarnera

§ 13. Annerpaamik akigitat, matumani isumaqatigiissut aalajangersimasoq malillugu nalunaaquttap akunneranut akiliinermut akigitat ilanngullugit, kommunalbestyrelsimit aalajangerneqassapput.

Imm. 2. Kommunalbestyrelsimit aalajangerneqartunit annersumik akiliinissaq isumaqatigiissutigineqarsinnaanngilaq piumasaqaatigineqarsinnaanilu aamma sulisumut kajumissaatinik piumasaqaateqartoqarsinnaanngilaq.

Imm. 3. Imm. 1 malillugu nalunaaquttap akunneranut akigititaq pillugu immikkut ittumik isumaqatigiissuteqartoqartinnagu, ingerlassineq taksameterimi akigitat malillugit suliarineqartutut isigineqarpoq. Ingerlassinernut taamaattunut aamma ingerlanneqarnissamut utaqqinermut atatillugu, taksameterip takutitaanit, tapiliussaasinnaasut ilanngullugit, kommunalbestyrelsimit akuerineqarsimasunit qaffasinnerusumik akiliinissaq piumasaqaatigineqarsinnaanngilaq.

Imm. 4. Ingerlassinerunngitsunut allanut akiliineq nassatat, taxap iluani inissinneqarsinnaanngitsut, assartorneqarnerannut, kiisalu nassatat majuunneqarnerinut ammukaanneqarnerinullu taamaallaat piumasaqaatigineqarsinnaapput. Kommunalbestyrelsimit akuerineqarsimasunit qaffasinnerusumik akiliinissaq piumasaqaatigineqarsinnaanngilaq.

§ 14. Taxa atorneqartillugu taksameteri taamaallaat ikumatinneqassaaq. Taxa sumiiffimmi aamma piffissami aalajangersimasumi takkuttussatut inniminnerneqarpat, taxap piffissami isumaqatigiissutaasumi sumiiffimmi aallerfissami pitinnagu, taksameteri ikinneqassanngilaq. Tamanna pisariaqarpat taxap takkussimanera pillugu inniminniisoq nalunaarfiginiarneqassaaq. Tamanna nipimik kalerrisaarinikkut pissanngilaq.

Imm. 2. Taxa atorneqartillugu, akigitat nikinnerini tamani, taksameteri erngerluni akigititamut nutaamut inissinneqassaaq, aamma tamanna pillugu ilaasoq erseqqissumik paasitinneqassaaq.

Kapitali 6

Unioqqutitsinerit

§ 15. Nalunaarummik unioqqutitsinernut akiliisitsissummik akiliisitsisoqarsinnaavoq.

Kapitali 7

Atuutilersitsineq

§ 16. Nalunaarut ulloq 1. juli 2025 atuutilissaaq.

Transportministereqarfik, ulloq [ulloq] 2024

THOMAS DANIELSEN

/ [atsioqataasoq]